

Juhuu, mir kriehn e Strondbad!

Habbt derrs gelese? Flerschem kriecht vunn de CDU unn de FDP e Strondbad omm Moo! Josses naa, doo muss ich mich joo mol außer de Reih ze Wort melle, weil dess iss e Ding!

Eischendlich wollt ich zu politische Oogeleschenheite nix merr schreiwe, weil wenn merr die Politiker, aach die Flerschemer, lowe dut dann isses Schmeichelei unn wenn merr se krätsche dut, aach die Flerschemer, dann isses Majestätsbeleidigung. Awwer zu dere Sach muss so enn ahle Flerschemer wie ich was saache.

Dess mettem Strondbad, dess wär was! Wie doomols, wie ich noch e Kind unn dess Ossi Fritz noch Baademoosder war, kennt merr sich im Strondbad uffs Gras leesche unn ab unn zu ins Moowasser hibbe, unn kennt, wenn die Welle vunn de Schiffe kumme, so rischdisch schee im Wasser schaukele – naa, dass ich in moine alde Daache so was noch erlewe derrf! Weeschem Moowasser missde merr uns koo schmutzische Gedonke mache, merr deet dann owwe onn de alt Schleuß Leitungswasser in de Moo laafe losse, um dess Wasser sauwerer ze mache, die Petra Roth hott dess joo aach schunn emol ferr die Fronkforder Triathlete ferrs Schwimme im Moo vorgeschlaache.

Iwwer oons misst merr noch emol redde, iwwer de Nome ferr dess Bad. City Beach Club hawwe se vorgeschlaache, awwer so was gibts aach in Rio. Mir hawwe de Moo, also wenn schunn englich, dann liewer Main Stream Beach Club. Awwer besser wärs, merr deet enn Nome nemme der dess hott, was uns in Flerschem vunn alle onnern Flecke uff de Welt unnerscheide dut, unn dess iss de Gänskippel.

Also oofach dess Bad „De Gänskippel“ nenne, weil dess kennde aach Papuaner ausspreche, wenn merr mett dene emol en Freundschaftsvertraach mache deete.

Wenn dess de CDU unn FDP nitt gefällt, dann kennde se joo oomol, wenischsdens oomol so due, alls wissde se nitt alles wie immer omm Beste unn deete emol die Flerschemer Leit frooche, was die fern Nome hawwe wolle, oofach nor so, später kennt die Koalition joo dann trotzdem wie immer mache was se selbst wolle.

E Strondbad, wie schee! Unn nitt nor ferr Flerschemer! Dohie kennt merr Wasserfluchzeuche fliehe losse vumm Waldsee newer de Nordwest-Londebohn bis onn de Gänskippel unn doo kennte die VIPs, dene die Lufthansa jetzt e Luxus-Terminal gebaut hott, mol so rischdisch Londluft schnupfern, so was iss joo heit widder schick. Unn merr kennt se e Stick de Moo hoch unn erunner fahrn im Nache, de Krebs unn de Fercher omm Fahrboom. Flerschemer zesomme mett de Lufthansa in oom Boot, genial! Die mache mettem Kranich unn mir mett de Gäns Reklame! Awwer mir missde uns eile, sunnst nemme uns noch die Schwonemer die Idee weg weilse moone, enn

Schwon wär enn schennern Voochel als e Gons. Unsern Beiemoosder misst dann e weiblich Gänseliesel oistelle, die mett Weidestecke unn Kot-Dutte hinnerm Trupp Gäns herlaafe muss. Ich heer die VIPs schunn rufe: Neiß, very neiß. Dabbeljuh, mäk e piktscher from se Gänslisse!

Ja werklich, dess mettem Bad misst jetzt schnell gieh, nitt nor weesche de Schwonemer, aach weesche de Griene. Bevor die ihr Palaver abgehalte unn sich in e paar Woche entschiede hawwe, dassa degeesche sinn. Weil die Mensche im Wasser die Fisch vertreiwede odder noch schlimmer mett ihm Sonneöl vergifte deete.

Nor oons deet merr nitt gefalle: Wenn dess mettem Strondbad enn kommunalpolitische Beitraach zum 11.11. gewese wär. Fassenacht iss nämlich e gons ernst Oogeleschenheit, doodemett mächt merr koo Späss!

Eiern Honnes